

## FRÁSÖGN

*af fundi stjórnarnefndar NATO-þingsins í París 2. apríl*

Hinn árlegi fundur stjórnarnefndar NATO-þingsins fór að þessu sinni fram í París. Á meðal helstu dagskrármála fundarins voru baráttan gegn hryðjuverkastarfsemi í heiminum, ástandið í Úkraínu, samskipti NATO-þingsins við Rússa og jafnréttisáætlun NATO. Auk þess fór fram umræða um starfsáætlun NATO-þingsins fyrir árið 2016 og fyrri hluta árs 2017 og fjárhagsáætlun auk stefnu Frakklands í öryggis- og varnarmálum. Af hálfu Íslandsdeildar NATO-þingsins sótti fundinn Þórunn Egilsdóttir, auk Örnú Gerðar Bang ritara.

Fyrsta mál á dagskrá var að umræða um svar framkvæmdastjóra NATO við stefnumarkandi tillögum og ályktunum NATO-þingsins sem samþykktar voru árið 2015. Framkvæmdastjórinn fagnaði ályktunum og tillögum NATO-þingsins og lagði m.a. áherslu á mikilvægi samstöðu aðildarríkja NATO-þingsins á tímum óróleika og breytinga í landfræðipólitík og alþjóðastjórnmálum. Lord Joplin, varaforseti NATO-þingsins, stýrði fundinum og lagði í máli sínu áherslu á samskipti NATO-þingsins við Rússa í ljósi atburða síðasta árið og mikilvægi þess að samræður eigi sér stað.

Næst kynnti hollenska þingkonan Angelien Eijsink skýrslu NATO-þingsins um jafnréttismál innan NATO-þingsins. Í skýrslunni er sjónum sérstaklega beint að kynjajafnvægi innan þingsins þ.e. hvernig kynjahlutföll eru í starfi þingsins og uppbyggingu og hvernig janréttismál eru innleidd í stefnumótun NATO-þingsins. Þá eru tillögur að úrbótum og umræðu lagðar fram í skýrslunni. Eijsink sagði það hafa komið á óvart við vinnu skýrslunnar hvað þáttur kvenna í starfi NATO-þingsins sé rýr og að úrbóta sé klárlega þörf. Hún benti á að það hafi ekki verið fyrir en á stjórnarnefndarfundi NATO-þingsins í Reykjavík í október 2007 sem jafnréttismál náðu athygli nefndarmanna og fram kom krafa um að þau væru skoðuð sérstaklega og sett á dagskrá þingsins. Engin formlega ákvörðun var þó tekin á þeim fundi um hvernig málum skyldi háttað, framtakssemi var undir hverri landsdeild komin og engin eftirfylgni við málið. Í skýrslunni er m.a. skoðað hvað hefur áunnist varðandi jafnréttismál innan þingsins undanfarin ár, samanburður við aðrar alþjóðastofnanir og tillögur að frekari úrbótum.

Þórunn Egilsdóttir tók þátt í umræðum um skýrsluna. Hún fagnaði því að jafnréttismálum væri sýndur aukinn áhugi innan NATO-þingsins og lýsti yfir ánægju með tillögur skýrslunnar að úrbótum. Hún benti á sláandi niðurstöður hennar þar sem fram kemur að eingöngu 19% fulltrúa á NATO-þinginu séu konur og eingöngu tvær landsdeildir hafi konu sem formann sinnar og önnur þeirra sé landsdeild Íslands þar sem hún sitji sem formaður. Það þurfi klárlega að gera mun betur þegar horft sé til þátttöku kvenna í starfi þingsins. Þá sagði hún árlega yfirferð frá framkvæmdastjóra NATO fyrir stjórnarnefnd NATO-þingsins um þróun stöðu kvenna innan sambandsins mikilvægt hjálpartæki til eftirfylgni og frekari framfarir. Jafnframt benti hún á að ályktun Öryggisráðs Sameinuðu þjóðanna nr. 1325, um konur frið og öryggi, hafi beint athygli umheimsins í auknu mæli að málefnum kvenna í varnar- og öryggismálum og mikilvægi þátttöku þeirra þar, sem og á öðrum sviðum samfélagsins. Eitt af markmiðum ályktunarinnar er að stuðla að sanngjarnri þátttöku og umboði bæði karla og kvenna í varnar- og öryggismálum þar sem þingmenn gegna lykilhlutverki. Þórunn sagði það því markmið allra aðildarríkja Sameinuðu þjóðanna að stefna að jafnri þátttöku karla og kvenna í þjóðþingum og nefndarstörfum og að það sama gildi um starf NATO-þingsins.

Þá var rætt um starfsemi, umræðuefni og áherslur NATO-þingsins fyrir seinni hluta ársins 2016 og fyrri hluta árs 2017. Síðustu ár hafa málefni Afganistan verið stærsta verkefni NATO og verður áfram mikilvægt viðfangsefni þótt þáttaskil hafi orðið í árslok 2014 með yfirfærslu öryggismála til Afgana. Önnur áherslumál hjá NATO-þinginu verða samstarf og stefna um opnun fyrir ný aðildarríki, norðurslóðamál, spilling og áhrif hennar á öryggi ríkja, kynjajafnrétti og öryggismál og samskipti þvert yfir Atlantshafs. Sérstök kynning fór fram á skipulagi næsta

vorþings sem haldið verður í Tírana í maí nk. Þingið mun fara fram með hefðbundnum hætti og gengur undirbúningur vel en fyrirhugað er að utanríkisráðherra, varnarmálaráðherra og forsætisráðherra Albaníu ávarpi allir þingið.

Loks var farið yfir fjármál NATO-þingsins og ársreikning fyrir árið 2015 sem var samþykktur samhljóða. Þá var vakin athygli á því að fjárhagsáætlun NATO-þingsins hefur ekki hækkað síðastliðin fimm ár þrátt fyrir verðbólgu.

Vorþing NATO-þingsins verður haldið í Tírana 27.–30. maí nk. Frekari upplýsingar fást hjá ritara Íslandsdeildar og á vefsvæðinu [www.nato-pa.int](http://www.nato-pa.int).

\*\*\*\*\*